



एलिसिबाके देहभारी भेला छ महिनाके बाद परमेस्वर गबरिएल  
स्वरगदुतके गालील परदेसके नासरत सहरमे पठाइलकै। उ  
मरियम नामके कुमाइर कन्याके घरमे गेलै, जकरा दाउदके  
खन्दानके योसेफ नामके लोकसे मडनी भेल छेलै।



स्वरगदुत ओकरा कहलकै, “नै डेरा, मरियम,  
कथिलेत तु परमेस्वरके किरपा पाबनेचिही।  
देख, आब तोहर देहभारी हेतौ आ तु  
एकटा बेटाके जलम देबही आ ओकर  
नाम येसु राखबिही। उ महान हेतै आ  
परमपरधानके बेटा कहाइतै। परभु  
परमेस्वर ओकरा ओकर पुरखा  
दाउदके सिंहासन देतै। आ उ  
इजराएलमे सबदिन राज करतै।  
ओकर राजके अन्त कहियो नै हेतै।”



मरियम स्वरगदुतके कहलकै, “यि कनडके  
हेतै? हम त कुमाइरे चियै।” स्वरगदुत  
ओकरा जबाफ देलकै, “पबितर आत्मा  
तोहर उपरमे एतौ, आ महान  
परमेस्वरके सक्तिके छाह तोहरमे  
परतौ। तैल्याके जल्मैबला  
बच्चा पबितर हेतै आ उ  
परमेस्वरके बेटा कहाइतै।”



कुछ दिनके बाद मरियम यहुदियाके पहाड़के सहरमे जल्दीसे गेलै। जते जकरिया रहैछेलै। उ घर भितर ज्याके एलिसिबाके गोरलगी करलकै। जब एलिसिबा मरियमके गोरलगी सुनलकै तब ओकर कोइखके बच्चा चलेलागलै, आ एलिसिबा पबितर आत्मासे भरपुर भ्याके, जोरसे कहलकै, “तु त जनिजाइतमे सबसे धैनके चिही, आ तोहर कोइखके बच्चा धैनके हेतौ।”



येसु ख्रिस्टके जलम एहेन परकारसे भेलै- ओकर माँ के  
मडनी योसेफसडे भेल छेलै,  
महज ओइसबके बियाह हैसे  
पैहनैये पबितर आत्माके  
सक्तिसे मरियमके देहभारी  
भेलै। महज ओकर घरबला  
योसेफ धारमिक लोक  
भेलाके कारन मरियमके  
समाजके अगा कोनो  
बदनामी नै हेबे कैहके ओकरा  
चुपे-चाप छोरैके बिचार करलकै।



महज जब योसेफ एहया बातके बिचार करतै रहै, तब सपनामे परमपरभुके स्वरगदुत एलै, आ ओकरा अनड कहलकै, “हौ दाउदके खानदानके योसेफ, तु मरियमके आपन घरबालीके रूपमे अपनाबैले नै डरा, कथिलेत जे ओकर पेटमे छौ, उ पबितर आत्मासे चियौ। उ एकटा बेटा जलमाइतौ, आ तु ओकर नाम येसु राखिहे, कथिलेत उ आपन लोकसबके ओकरासबके पापसे बचाइतौ।”



ततबेहेकमे योसेफके निन टुइटगेलै, आ परमपरभुके दुत ओकरा कहल बमौजी योसेफ मरियमके आपन घरबालीके रुपमे अपनाइलकै। मरियमके बेटा नै जल्मै तक योसेफ ओकरसडे नै सुतलै। जब बालकके जलम भेलै तब योसेफ ओकर नाम येसु राखलकै।



ओड़ बखत रोमी महराज अगस्टस हुकुम करैत कहलकै राज  
भैरके सब लोकके नाम लिखाके दरता करैले परतौ।  
नाम दरता कराबैले सब  
लोकसब आपन-आपन  
पितापुरखाके गाम  
आ सहरमे गेलै।



योसेफ ओहो गालीलके नासरतसे यहुदियाके बेथलेहेम सहरमे  
गेलै, कथिलेत उ रजा दाउदके कुल-खन्दानके सदस छेलै।  
नाम लिखाबैले उ आपनसडे  
मडनी भेल्हा मरियमके सडे  
लके गेलै। ओइ  
बखत मरियमके  
देहभारी छेलै।



उसब बेथलेहेममे छेलै तहै  
बखत मरियमके बच्चा  
जल्मैबला बखत आइबगेल  
छेलै।



उ आपन जेठका बेटाके जलम देलकै तब ओकरा गुदरीमे  
लपेटके गोहालिके नाइदमे सुतेलकै कथिलेत ओकरासबके  
धरमसलामे ठहरैले कतौ  
ठाम नै मिल्लै।



रातमें आपन जेरके रखबारी करैबला चरबाहसब देखभाल करैत  
बेथलेहेमके ओहै ठामदिसन रहै। परभुके स्वरगदुत ओहै ठाम  
देखा परलै, तब परभुके इजोत चारुऔर  
चरबाहासबके उपर चम्कलै,  
आ उसब  
एकदमसे  
डैरागेलै।



तब स्वरगदुतसब ओकरासबके कहलकै, “नै डेरा, देख, हम तोरासबके बहुत खुसीके सुसमाचार सुनाइबौ, जे सब लोकसबके लेल हेतौ। ओइ दाँउदके सँहरमे

मुक्तीदाताके जलम भेल छै,

जे खिरिस्ट परभु चियै।

तोरासबके लेल ओकरा

चिनहैबाला चेन्हा

यि हेतौ, एकटा

बालक गुदरीसे

लपेटल आ नाइदमे

सुतल भेटतौ।”



तब ओहै बखत औरो बहुतेकरा स्वरगदुतसब ओइठाम देखा  
परलै तब परमेस्वरके परसन्सा करैत कहलकै,  
“स्वरगमे परमेस्वरके महिमा, आ  
पिरथिबीमे जै लोकसबसे



परमेस्वर खुसीछै,  
ओकरासबके  
सान्ती।”



जब स्वरगदुतसब चरबाहासबके छोडरके स्वरग दिसन गेलै तब चरबाहसब आपनेमे बतियाइत कहलकै, “चल अपनासब बेथलेहेम तक आ परमपरभुके कहलाहा बातसब ज्याके देखेपरतै।”



उसब हबर-दबर गेलै, ओते मरियम, योसेफ  
दुनुगोरैके सडे देखलकै आ ओइ बालकके  
नाइदमे सुतल देखलकै। चरबाहासब बालकके  
देखलकै तब स्वरगदुत कहने रहै से बात  
सबकोइके ओकर बारेमे सुनेलकै।



रजा हेरोदके बखतमे  
यहुदिया परदेसके  
बेथलेहेम गाममे जब  
येसुके जलम भेलै,  
ओह्या बखत  
पुरुबसे

ज्योतिसीसब यरुसलेममे एलै, आ उसब  
लोकसबसे पुछलकै, “यहुदीसबके रजा  
भ्याके जलमल कते छै? हमसब ओकर  
जलमके थाह दैबला तरा पुरुबमे उगल  
देखलियै आ ओकरा दरसन करैले  
एलचियै।”



तब रजा हेरोद ओइ ज्योतिससबके  
एकान्तमे बोल्याके तरा कोन  
बखतमे देखा परल छेलै, से  
बात ओइसबके पुछपाछ कैरके  
सहि समय पता लगाइलकै।  
तकरबाद उ ओइसबके यि बात  
कैहके बेथलेहेम पठाइलकै, “जो,  
आ असलसे ओइ बालकके  
खोजि कर। जब उ बालक  
भेटतौ तब हमरा खबर करिहे,  
तब हमहु ओकरा  
दरसन करबै।”



तब रजाके बात सुइनके ज्योतिससब आपन बाट चैलगेलै। जे तराके उसब पुरुबमे उगल देखे रहै, उ तरा ओइसबके अगा-अगा बरहैत गेलै, आ जै घरमे उ बालक छेलै, तहै घरके उपरमे पहुचके ठहैरगेलै। तब उसब घर भितर दुकलै आ माँ मरियम सडे बालकके देखलकै।



तब ठेडहनिया दयाके ओकरा गोरलागलकै आ तब आपन-आपन पेटी खोइलके सोना, सुगन्ध दैबला धुप आ महग अतरके तेल भेटी चरहेलकै। तब हेरोदलग घुइमके नै जो कैहके सपनामे चेताबनी पाइबके उसब दोसर रस्ता हैत आपन देसमे घुइमके गेलै।





उ ज्योतिससब गेलाके बाद,  
परमपरभुके एकटा दुत सपनामे  
योसेफलग देखा परलै आ कहलकै,  
“उठ, बालक आ ओकर माँ के  
ल्याके मिसर देसमे भाइग जो,  
आ हम तोरा नै कहै तक  
ओतै रह। कथिलेत हेरोद  
बालकके मारैले ओकरा  
खोजी कैररहल छौ।”



तब उ उड़ठके बालक आ ओकर  
माँ मरियमके साथमे ल्याके  
राइते-राइत मिसर देसमे चैलगेलै,  
आ हेरोद नै मरै तक ओतै रहलै।  
अहिनडके अगमबक्तासे  
परमपरभुके कहल बचन  
पुरा भेलै, “हम आपन  
बेटाके मिसर देससे  
बोलेलियै।”



जब रजा हेरोद देखलकै कि  
ज्योतिससब ओकरा धोखा देनेछै,  
तब उ तामससे चुर भ्यागेलै।  
ज्योतिसेसबसे थाह भेल्हा समय  
अनुसार बेथलेहेम आ ओइ इलाकामे  
भेल दुइ बरिस आ ओइसे कमके  
सब बालकसबके मारैले लगाइलकै।



तब हेरोद रजा मरलाके बाद,  
परमपरभुके एकटा स्वरगदुत  
सपनामे योसेफ लग मिसरमे  
देखाब देलकै आ कहलकै, “उठ,  
बालक आ ओकर माँके सडे  
ल्याके इजराएल देसमे जो,  
कथिलेत जेसब बालकके  
जानसे मारैले चाहैछेलै  
उसब मैरगेलछै।”



महज यहूदीयामे हेरोदके बेटा अरखिलाउस,  
आपन बाबुके ठाममे,  
राज कैररहलछै से बात  
सुइनके उ ओने जाइले  
डेरलै, तब फेनो उ  
सपनामे



परमेस्वरके चेताबनी  
पाइबके गालील परदेसमे गेलै।  
ओतेसे उ नासरत नामके सहरमे रहेलागलै।  
अहिनडे परमेस्वरके अगमबक्तासबके कहल बात पुरा  
भेलै: “उ नासरी कहतै।”



कथिलेकी परमेस्वर सन्सारके लोकसबके  
एहेन परेम करलकै कि उ आपन एकलौता  
बेटाके देलकै। ओकर उपर बिस्वास  
करैबला नास नै हेतै, महज उ  
अनन्त जिबन पाबतै।



रोमी 3:23 कथिलेत सबलोक पाप करने छै आ परमेस्वरके महिमा तक पुगैले चुकल छै।

रोमी 6:23 कथिलेत पाप करैबलाके बैन मिरतु चियै, महज फोक्टेमे देल परमेस्वरके बरदान त अनन्त जिवन चियै जे अपनासबके परभु येसु खिरिस्टमे देनेछै।

हिबेरु 9:27 जहिनड लोकसबके एकबेर मरनाइ निश्चित छै तहिनड मरलाकेबाद ओकर नियाय निश्चित छै।

एफिसी 2:8,9 कथिलेकी परमेस्वरके अनुगरहसे तुसब बिस्वाससे बच्याल गेलचिही। तुसब आपनेसे कोसिस करके नै, यि त परमेस्वरके देल बरदान चियौ। यि तोरासबके कामसे नै भेलछौ, नै त लोक घमन्ड करतियै।



रोमी 10:9,10 यदि तु येसुके हमर परभु चियै कहके आपन मुहसे सुइकार करबिही आ परमेस्वर ओकरा मरलसे जिबित करलकै कहके आपन हिरदयमे बिस्वास करबिही त तोहर उधार हैतौ। कथिलेत लोक आपन हिरदयसे बिस्वास कैरके परमेस्वरके अगा धरमी ठहरैछै आ बिस्वास करल बात आपन मुहसे सुइकार कैरके उधार पाबैछै।

युहन्ना 3:16,17 कथिलेकी परमेस्वर सन्सारके लोकसबके एहेन परेम करलकै कि उ आपन एकलौता बेटाके देलकै। ओकर उपर बिस्वास करैबला नास नै हैतै, महज उ अनन्त जिबन पाबतै। परमेस्वर त आपन बेटाके सन्सारके दोसी ठहराबैके लेल नै महज ओकरसे सन्सारके लोकसब बचे कहके पठेलकै।

1 युहन्ना 5:11-13 उ साक्छी यि चियै कि परमेस्वर अपनासबके अनन्त जिबन देने छै आ उ जिबन ओकर बेटामे छै। जकरसडे परमेस्वरके बेटा छै, ओकरसडे जिबन छै आ जकरसडे परमेस्वरके बेटा नै छै ओकरसडे जिबन नै छै। तुसब परमेस्वरके बेटाके नाममे बिस्वास करैबलासबके हम यि चिठी लिखैचियौ, ताकी तुसब अनन्त जिबन पाबनेचिही कहके थाह हेबे।



मती 1-2; लुका 1-2

Storyline by: Edward D. Hughes

Illustrated by: M. Maillot  
and Alastair Paterson

Adapted by: E. Frischbutter; Sarah S.

Tharu Kochila NT (thq) © Wycliffe Bible Translators, Inc. All  
rights reserved.

<https://www.bible.com/bible/3290/MAT.1.MTH>

©2025 Bible for Children, Inc.

[www.M1914.org](http://www.M1914.org)

[www.bibleforchildren.org](http://www.bibleforchildren.org)

